

Premesse

GIUSEPPE FIRRAO*

Te sô lungje cariere Romano Locci al à puartât indevant une ativitât publicistiche cussì intense e svariade che al devente dificil proponi ancje dome une testimoniance par ognidun dai tancj arguments che a àn stiçât il so interès. Par chest ricuart o vin sielzût trê articui che a ilustrin trê ategjaments diferents che al à tignût tai confronts de ricercje, in altris peaulis trê diviers aspiets de sô personalitât sientifiche.

Tal prin articul o cjatin il Locci ricercjadôr sperimentâl, zovin ma bielzà preseât a nivel internazionâl pe sô tecniche e metodologjie inovativis e pe impuartance dal contribût des sôs indagjins sperimentâls ae comprehension des problematichis sientifichis. In chest articul, *On the spore formation process in actinomycetes. I. Morphology and development of Streptovercillium species as examined by scanning electron microscopy*, dulà che ancje cui che nol è espert al è bon di ricognossi la alte cualitât des imagjins otignudis cu la tecnologjie disponibile in chês volte, Romano Locci e Bruna Petrolini Baldan a frontin, tant che pionîrs dal cjamp de morfologjie dai actinomicêts, la problematichis de diferenziacion celulâr, che tante part e varà tal disvilup de biologjie tai 40 agns seguitîfs.

Dongje dal Locci impegnât te ricercje biologjiche di base o vin il Locci avodât ae ricercje aplicade tal so territori. Il secont articul, *Il cancar dal cjastinâr*, si insuaze dentri dal so impegn a trasferî te realtât dai boscs furlans ce che al jere di miôr te ricercje internazionâl – ricercje puartade in-

** Dipartimento di Biologie e Protezione delle Piante, Università del Friuli, Italia.
E-mail: giuseppe.firrao@pldef.uniud.it

devant ancje tal so laboratori di Udin – par controlâ, cun mieçs rispjetôs dal ambient, une impuartante malatie dal cjastinâr. In chest articul o podin preseâ la sô abilitât te divulgazion di concets scientifics complès e te ricercje terminologjiche par podê pandiju cun proprietât te lenghe furlane.

Par ultin al è un tierç articul, dulà che e ven fûr dute la sô vene didatiche e narrative. Ancje se pocje int lu imagjine, te sience a son ancje aspiets aventurôs e movimentâts e Locci al saveve contâju cun snait. Ancje se nol veve vût une part ative tai episodis che a vegnin descritti, Romano Locci al veve cognossût di persone tancj dai protagoniscj de straordinarie saghe dai antibiotics presentade ta *La discuierte dai antibiotics. Gjentamicine*, ju veve osservâts dal pont di viste privilegiât dal colleague introdut tal ambient e duncje al jere bon di contâju cu la ironie e la gracie che tant lu contrassegnavin.